



29. september 2014

UKA 2014/115

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiupparput:

Inatsisartut Kukkunersuinermit Ataatsimiititaliaata Nunatta Karsiata akiligassarsiffittut Naalakkersuisunut ilaasortanit atorneqarsimasorinarneranit ilisimatitsinera pillugu apeqquteqaat aallaavigalugu oqallinnissamut siunnersuut kiisalu Inatsisartut pisut pillugit isummernissaannik siunnersuut.

(Sara Olsvig, Inuit Ataqtigiit; Anda Uldum, Demokraatit; Hans Enoksen, Partii Naleraq; Randi Broberg, Partii Inuit)

Tungavilersuut:

Pisut ilaanni; nalunngilluinnartarput qaqugukkut eqqunngitsuliortoqarnersoq eqqortuliortoqarnersorluunnit. Soorlu nalusanngikkipput; pisiniarfimmi sulisoq karsimiit tigusiguni, taava soraarsitassaaq. Tassa karsimiit aningaasanik tigusineq eqqunngitsuliornerummat.

Eqqortuliornerunerluni Namminersorlutik Oqartussat ilassinnittarfiini nammineq inuttut atuineq? Imaassanerpa, uagut politikkikkut aalajangeeqataasartussatut qinigaasimagatta; taava pisiatsinnut akiliisassanngitsugut?

Kukkunersuinermit ataatsimiititaliamit ilisimatitsissummi pissutsit nassuiaatigineqartut ileqqorissaarnermit naapertuutingillat.

Uani suliami ilungersunartumi takuarput Naalakkersuisut nalilersuisinnaassuseqannginnerat.

Taamaattumik Inatsisartut Kukkunersuinermit ataatsimiititaliap ilisimatitsissutaat tusagassiutinullu nalunaarutaat Nunatta Karsiata aningaasaataanik atornerluisimanermit tungasoq partiit ilungersunartutut tigusariaqarpaat.

Naalakkersuisut siulittaasuata inuiaqtigiit aningaasaataanik ingerlatsinermini pissaanermik atornerluineq takutitaa illuatungiliuttut partiivisa



akuerisinnaangilluinnarpaat. Annermik maluginiarparput pineqartut tassaammata pissutsit ukiuni arlalinni ingerlasimasut, ataasiaannarnerunngitsullu.

Illuatungiliuttut partiivisa erseqqissumik oqaatigissavaat taamatoqqinnaaq isummersussagamik, Naalakkersuisut maanna siulittaasuut siuliiluunniit pineqaraluarpata. Nunatta Karsia – kinaluunniit sunaluunnillu pineqaraluarpata – atorreqassanngilaq nammineq angalanernut, nammineq katerisimaartitsinernut, nammineq minibarinik atuinernut il.il. Tamanna akuerineqarsinnaanngilaq.

Pisariaqarpoq Nunatta Karsiata aningaasaataasa illersorneqarsinnaasumik aqunneqarnissaat. Naalakkersuisut pisussaaffigalugulu akisussaaffigaat, aqutsinerup inatsisit malittarisassallu atuuttut naapertorlugit ingerlanneqarnissaa.

Nunap aqunneqarneranut akisussaasutut inissisimaneq, suli annermik inatsisinik malittarisassanillu maleruaanissamik piumasaqaatitaqarfiuvoq, taamatullu Inatsisartunik Namminersorlutillu Oqartussat ingerlatsiviinik qanimut tamanullu ersittumik pissuseqarnissaq piumasaqaataalluni.

Takusinnaavarput Naalakkersuisut Siulittaasuata tamanna piviusunngortissinnaanngikkaa, tamannalu Nunatta iluaqutigisinnaangilluinnarpa.

Nunatta aqutsisuisa ataatsimoorluta aningaasaatitsinnik inatsisinik unioqqutitsillutik ingerlatsinerat tusagassiutini qulequtarineqaraangat Nunarput annertuumik innarlerneqartarmat.

Suliap ilungersunartuunera naqissusertariaqarparput; Kukkunersiuinermut ataatsimiititaliaq isumaqatigiittoq aalajangermat suliaq malersussallugu avammullu saqqummiutissallugu. Taamaattumik ullumikkut Inatsisartut oqaluuserisariaqarpaat qanoq ingerlariaqqittoqassanersoq, Inatsisartut ileqqorissaarnermut isummernerat isiginnaattaasiallu inuiaqatigiit toqqissisimanerannut kiisalu aqutsinermut tatiginninnerannut aalajangiisuussaaq.